



Umsögn

Viðtakandi: Velferðarráð

Sendandi: Regína Ásvaldsdóttir, sviðsstjóri

Efni: Umsögn um tillögu borgarfulltrúa Flokks fólksins um að veita lágtekjuheimilum sértæka aðstoða vegna gjalda tengdum börnum

Á fundi borgarstjórnar þann 21. júní 2022 lagði borgarfulltrúi Flokks fólksins fram svohljóðandi tillögu um að veita lágtekjuheimilum sértæka aðstoða vegna gjalda tengdum börnum :

Lagt er til að borgarstjórn samþykki að veita foreldrum á lágtekjuheimilum í Reykjavík sértæka aðstoð til að standa straum af gjöldum í tengslum við börn sín eftir atvikum og þörfum þeirra. Fulltrúi Flokks fólksins leggur til að reglur Reykjavíkur um fjárhagsaðstoð verði endurskoðaðar með tilliti til þess að börn tekjulágra foreldra fái styrk til að greiða fyrir daggæslu barns í heimahúsum, leikskólavistun og frístundaheimili, sumardvöl og þátttöku barns í þroskandi félags- og tómstundastarfi. Tryggt verði að foreldrar sem þiggi fjárhagsaðstoð fái ávallt styrk vegna þessa. Jafnframt verði veittur slíkur styrkur til lágtekjuhópa sem ekki þigga fjárhagsaðstoð. Lagt er til að starfshópi skipuðum sérfræðingum frá skóla- og frístundasviði og velferðarsviði verði falið að kanna hvernig skuli útfæra slíkt styrktarúrræði þannig að það nái til fátækustu barnafjölskyldnanna og sem flestra barnafjölskyldna sem eiga erfitt með að standa straum af kostnaði í tengslum við börn sín. Það er afar mikilvægt að tryggja að öll börn sitji við sama borð og að þau hafi jöfn tækifæri án tillits til efnahags foreldra þeirra. Það er samfélagsleg skylda okkar að aðstoða foreldra sem eiga erfitt með að greiða gjöld vegna þjónustu við börn sín.

Tillögunni var vísað til meðferðar velferðarráðs.

Umsögn:

Stýrihópur velferðarsviðs lagði fram á árinu 2020 áætlun um aðgerðir gegn sárafatækt barna og fjölskyldna þeirra þar sem m.a. voru lagðar fram breytingar á reglum Reykjavíkurborgar um fjárhagsaðstoð og sem lutu að þjónustugreiðslum til foreldra sem fá fjárhagsaðstoð til framfærslu (fylgiskjal 1). Á fundi velferðarráðs þann 24. febrúar 2021 voru síðan samþykktar breytingar á reglum um fjárhagsaðstoð frá Reykjavíkurborg. Reglurnar tryggja foreldrum sem fá fjárhagsaðstoð til framfærslu styrk til áfallandi gjalda vegna leikskólavistunar, skólamáltíða og frístundaheimila, auk þess sem styrkur vegna dagvistar er aukinn. Á grundvelli sérstakra meðferðar- og/eða stuðningssjónarmiða er jafnframt heimilt að veita foreldrum styrk vegna áfallandi greiðslna sem nema heildarkostnaði eða hluta hans, vegna daggæslu barns í heimahúsum, leikskóla, skólamáltíða, frístundaheimilis, sumardvalar, skólagjalda og/eða þátttöku barns í þroskandi félags- og tómstundastarfi. Til grundvallar liggja því ætíð meðferðar- og/eða stuðningssjónarmið en ekki tiltekin tekjuviðmið.



Í fyrrnefndri aðgerðaáætlun var fjallað um gjaldskrár Reykjavíkurborgar í tengslum við börn og barnafjölskyldur. Í áætluninni kemur fram að Reykjavíkurborg, í samanburði við önnur sveitarfélög, veitir nokkuð rýmri niðurgreiðslur. Nokkuð ósamræmi er aftur á móti í gjaldskrármálum milli sveitarfélaga, s.d. hvort börn fái þjónustu án endurgjalds eða ekki. Gjaldtaka þó lág sé, getur þannig hindrað þátttöku barna sem búa við sárafatækt. Hópurinn starfaði einungis í umboði velferðarsviðs en kom engu að síður á framfæri ákveðnum ábendingum almennt séð, sem og til skóla- og frístundasviðs og íþrótta- og tómstundasviðs vegna gjaldskrármála.

Reykjavíkurborg tryggir tekjulægsta hópi samfélagsins þ.e. þeim fjölskyldum sem þurfa á fjárhagsaðstoð að halda, umtalsverða styrki til að mæta föstum útgjöldum vegna barna sinna. Auk þess hefur allt umsóknarferlið verið einfaldað, þannig að foreldrar fá upplýsingar um styrki vegna barna um leið og sótt er um fjárhagsaðstoð.

Fylgiskjal:

Aðgerðaráætlun stýrihóps velferðarsviðs gegn sárafatækt barna og fjölskyldna þeirra, október 2020.